

FAULA V.

LA PASSRA-SOLITARIA E LA BERTA.

Na Berta ch' à scapava dal pajis
 Distruta dala fam , dala vrmina
 A l' era capità dssà dl Monsnis ;
 Virand pr la pianura sta sguadrina ,
 E svolassand pr là vers dl Sangon ,
 A s' era ritirà ant una boschina ,
 E là cantand al solit soa canson ,
 Fasend dji sgari rauc , mila smorfiasse ,
 Mostrand 'l cul , cercava a desse d' ton.
 A s' era con ste ghemne caparasse
 I merlo , i torsacoi , j' orieui e i gai ;
 E tuti d' sta pest son namorase.
 Sercavo l' un pr l' autr d' feje d' regai ,
 E chila a j' antascava le grumele ,
 Fasend ancor le smorfie a sti sonai ;
 Disendie ch' l' ero goffe sue fumele ,
 Ch' a l' ero bone a nen , l' avio gnun-deuit ,
 Ch' a smiavo pr cantè tante crivele ;

Sti povri torsacoi ch' a l' ero cœuit ,
 Sentiend couste rason , tuti pien d'ira
 Ai guardavo pinen nè di , nè neuit.
Le cose a l' ero vnue a cousta mira ,
 E ste povre fumele disgrassià
 Fondio an piourassand parei dla sira.
Distruta dal sagrin e soffocà
 Forsa d' sangiouss na passra solitaria ,
 A l' ha cercà d' commeuve soa mità ,
Butandse na matin a cantè n' aria
 Piena d' cadensse e d' son tan melodious ,
 Ch' avrio commos na tigr sanguinaria.
Disendie con un ton e con na vous
 Piena d' amour..... E voi vouli chiteme ?
 E voi veule pinen esse me spous ?
Che ombra de mancament peule imputeme ?
 Nen-aut prchè ch' i v' hai amave trop ,
 E pr-lolì voi veule abandoneme !
Disendie lò , lo ved ch' andava sop ,
 E ch' a-poudia pinen sauté sle rame ,
 Prchè tuti i branchett j' ero d' intop.
La Passera ai soggiuns..... cos' m' eve fame ?
 Dimlo , feme 'l piàsì , parleme ciair ?
 Oh s' i t' saveisse (ai dis) lò ch' m' è rivame :
La Berta a m' a sedoutt e mname al sgair :
 A m' ha tacame 'l mal dla caussinera ,
 E peui apress d' lolì m' ha fait fè ciair !

Possibil (chila ai dis) ch' loli sia vera ?
Che trop (l' autr ai rispond , e tuti j' ait
A son tuti tratà d' sta manera !
'L torsacol lè tisich , e lè andait ;
'L merlo a se ciápasse un porta-coa :
L' orieul l' ha 'l prè ch' ai dagnà e mes dsfait.
'L gai a l' ha dcò chiel trapà la soa ;
E mi , cara mojer , s' a va così ,
Miraco se i' podrai pì fè la roa !
Amprende voi giovnot e guardè lì
Cosa as guadagna a coure apres dle berte
Ch' a veno da lontan..... scouteme mi :
Lasseje ai cornajas , a le laserte.
